

文谷漁嬉稿

萬曆丙子四年時七十二

首春文會

玉燭調青律文明啓泰元日章君子道時憲
聖人言妙義三經析希聲五字翻翰華凌綵
勝春象滿東軒

正月六日喜陽谿過訪二首

適枉乘春駕言申隔歲期北山吾是我南郭
子爲誰獨往凌瑤雪同懷覓紫芝平生鷄黍
意猿鳥或能知

冒雪猶能訪空山合有人足音誰不喜心賞



自相親飯煮瓶中粟柴焚澗底薪淡然無世
味却是野田春

穀日壽雲川君

獻歲爭傳栢葉杯何如王子宴春臺祥逢穀
旦梅迎雪慶衍燈宵雪映梅三鳥拂雲將果
至群龍流水駕車來洞天光景應無限桃海
看花定幾迴

寄懷呂徵君時在潞安

去年惜別桃花春今日傷離柳色新仙嶠遙
通滄海夢僧房慣住白雲身郭東遺佚中林

老江左名流大國賓相憶却憐汾潞近寄聲
猶得往來頻

寄懷上黨程存齋先生

束帛無因贈子華絨書聊且遡情涯遙憐海
客同雙樹自笑山人隔九霞秀藻千章杼斗
酒清言幾段落杯茶經春碧草遮行逕桃水
煙洲路更賒

寄懷上黨李養虛先生

何事高才李裕州清時早已卧林丘逃禪五
馬雙旌貴草聖千金一字道憶昔彩毫能見

枉慙今秃筆若爲酬東軒藹藹停雲意只向
龍門漳水頭

元夕贈楚峒上人用來韻

香牀宴坐一禪清詩卷行吟萬里情月寫冰
壺空是色雲和玉磬靜成聲寒山古寺繡經
徧深竹閑園駐錫輕五夜燃燈供繡佛蓮花
時轉大光明

寶善堂燈宴

春城元夜萬家燈別有蓬萊最上層璧月吐
華藜火樹珠星結綵挂金繩屏圍翠水鮫光

濕樓薄紅嵐蜃氣凝福地好春人不見驂驪
爭覩路傍乘

瓊筵朱邸上元燈七寶粧成五色層酒稔冬
醅斟翠栢饌香春餅襯紅綾烟花萬朶金枝
秀火錦千章玉軸凝極宴詎嫌宮漏永鶴笙
時繞曙光升

釋子楚峒年少嗜詩來自京國訪余汾
上之亭屬嘉藻見貽尋別去將遊彼中
條因贈酬二首

遊於方之外貌釋而趣文不逐紫衣侶寧同

白社群清言對庭樹麗藻發身雲南況中條
去與誰凌翠氛
霞散文成綺花生錦上春五言超半偈近體
攝全身古寺叅無業空林若有人誰知珠在
繫未是野僧貧

再贈楚峒北還

春草行應歇夏條歸已繁流暉杯裏度歷景
拂邊論貝葉移詩卷榴花當酒尊知將碧雲
思齋向竹林園

題柳川館鏤花紙燈

光采玉繩牽文華金錯妍人將燈椀視我
月輪懸幕歷垂珠網玲瓏結綺錢誰知一尺
素澄徹九霄烟

晦日西園雅集

初月俄成晦明朝已仲春列筵將急景敦賞
愜同人邊雪迎鴻盡城烟上柳新風光和酒
力應向百年身

崑山館聽南洲說法

仙人騎白鹿下聽演三車支果小童學宗門
大士家香風吹海水法雨灑天花回向清都

去長空有斷霞

登杏花村酒樓

春來何許豁吟眸
村路透迤芳草洲
馬繫短楊遙問酒
鶯啼修竹近登樓
偏憐半醉遊三日
不分孤生老一丘
叮囑杏花徐點綴
莫隨桃水向東流

春分日感懷

微雨灑青烟
漠漠柔風生
綠草萋萋暗
機已剖
春中斷餘景
剛成月半携
猶恐落暉還
促迫亟從芳苑
共攀躋
多情獨是畫
胡鳥偏

杏花村裏啼

春至林木變

旭日照山楹
前陂烟水生
空林何澹蕩
衆木總芬榮
微綠工初染
深紅畫未成
勾萌皆變態
翔泳亦含情
戲鏡魚吹沫
調簧鳥弄聲
二三隱君子
安可廢鉶罍

參知華山公陟憲臺長

薇省霜臺望並隆
百城觀感萬心同
明如玉鏡開雲淨
清比冰壺湛月空
思召豈惟耽茂樹
戀周聊假賦遵鴻
泰階此日何宣朗
賢路

方當進上公

贈呂磻谿教授北歸

蹉跎江國早懸車，笑傲何慙宴里閭。
元亮不貪五斗米，子雲自愛一林書。
花潭酒衍新詩出，香閣鐘聞舊講餘。
回首西園明月夜，恍然塵夢落清虛。

和陽谿山中見懷二首

晨興獨多意，啼鳥落花中。
勝水谿頭屋，盤山谷口宮。
窓含杏壇雨，簾捲竹林風。
望裏仙源近，沿洄路轉窮。

緬子樂南田，愁予渺北川。
澗花紅欲染，池柳綠堪牽。
踏閣阻芳月，停杯悵夕天。
將心托瓊樹，時繞碧溪邊。

內省軒新葺池塘

內省軒前一片地，等閑開作種蓮池。
葉含圓景金田合，花發靈根玉井移。
風細落霞凭檻處，月明清露捲簾時。
香光撲面羅衣冷，不著紅塵始自知。

南洲上人王莊蘭若

色相不離塵，還將證本因。
人烟資一鉢，佛火

寄雙輪窮岫雲爲友空齋樹作鄰誰知古橋
畔見住法王身

三月三日侍太霞亭曲水宴

上巳屬時熙祕亭樂在茲華杯追往事嘉客
萃來思汲綆寒泉井流杯曲水池穿花浮落
葉遶樹櫟低枝頌湧方連絡迴飄復逶迤酌
蘭渾是醉吟草忽成詩九轉天潢派千春帝
子期丹霞隔城市遙聽綵鸞吹

王司馬巡視朔方

邊城楊柳綠依依上相行春別有暉節鉞省

臺新法象樓船淮海舊聲威平胡更講安危
畧定國尤嚴戰守機元老到來猷自壯我歌
周雅贈旋歸

碧桃花下聽吹笙

玉笙吹紫烟時向碧桃邊縹緲九霄奏悠揚
三月天耳和聞鳳曲心愜對花筵不是洛賓
侶飄飄願學仙

春晚杏花亭小集

杏花春幾許流水去閑閑草遶臨城斷柴門
隔樹關多愁催白首一笑返紅顏吾意真堪

適自餘非所攀

暮春過子夏祠

舊蹟陶山表荒祠相里存
土花閑雨繡石樹斷雲屯
聖遠傳經術時危輟道論
寥寥竟千載誰與奠芳蓀

暮春宴金蘭館賦酬

崇蘭幽谷裏叢桂小山邊
招隱非無地陶嘉剩有天
舞花頻送酒歌鳥競調絃
適意芥塵物惟餘藻思牽

落花二首

三杯賞花酒一片惜花心
何待紅芳歇臨開念已深

宿酒侵晨散林堂小徑斜
滿堦紅撲蔌却是夜來花

感遇四首

積思能令神鬼通定知此語決非空
打開太極從前竅恰是先天一老翁

獨掩荆扉歎日斜更無人問野人家
夜來却有風雷至鐵樹新開幾朶花

盤龍寶鏡絕塵埃妙有都從一照開
只爲色

空非見解智人拈出暗人猜
緱氏山頭逢子喬玉笙吹起鶴飄飄曲終騎
鶴杳然去獨立有人愁慶霄

山中答李使君見枉用韻

旌榮遙臨背郭堂薜蘿生采蕙生香巢林事
業一枝小補袞文章萬丈長竹裏掃雲安几
席花邊汲井漱壺觴十年關尹無奇遇今日
青山禮伯陽

壽王龍池先生

勝日長懷玉樹枝榴花天酒慶生時門迎多

是大羅客山祝惟應小雅詩仙籍紀年南極
注儒林遯世少微知無能學得馮虛子一策
冷風副所期

讚王龍池先生小像

溫潤而栗純粹以精維金之鑑維玉之衡維
岳之重維辰之明文命之表德克之符國之
楨幹庭之典謨懿厥宏規詠此瑞圖

謝查毅菴王秋溪二使君見枉丘園

蓬蒿不辨野人廬邂逅何期長者車紫氣忽
浮雙翠蓋玄言時映九霄書香生古栢含風

遠光轉孤桐上月初坐對夜深渾點點恍然
空水一舟虛

雜言

燕雙雙薄倖郎尾涎涎巢君梁啣泥濺文杏
落穢庭中央群生八九子亂點千金白玉床
主人憐汝特呵護保汝出入無憂惶夕扉恒
晚閉朝戶闢晨光丁寧戒兒女莫作打鴨驚
鴛鴦主人恩甚厚胡爲却相忘去不辭謝來
不叅詳賴道去時壘好墻不知若箇是渠房
啁啁晰晰逞口強自焚其巢先笑後號咷

西園牡丹亭侍宴作

仙苑名花拂檻新東皇畱與十分春丹堯合
是園林主翠葆渾如侍從人光映水簾搖畫
障影飄羅袖入香塵喜將供奉清平曲爲勸
金樽滿百巡

紅藥欄邊飲酒賦詩

觴詠陶嘉處林園芍藥圍樹光流綠暈花氣
灑紅霏游目炎朝永傷心春事微繞欄看未
足移簟坐相依絕代愁空老穠香畏易晞有
懷人不見無復贈將歸

題鄰溪園

堦翻紅藥盡簾捲翠微來鳥趁嵐光下魚吹
荷氣開林香縈宿靄泉潔澹炎埃樹裏仙人
館雲邊帝子臺扶筇愜登眺岸幘重徘徊綠
篠紛瑤席青蒲泛玉杯自然淹客醉况復鳳
笙催

首夏猶清和社中作

不堪芳草歇况復妍花飛稍喜身猶健高歌
事不遠園苗暢和澤林館澹清暉及此邀吾
老携壺坐翠微

清和文會同賦西苑池亭

高園愴情景陶詠嘉宴娛道與朝心契文因
夏氣敷清暉蕩喧濁和吹轉虛無亭上瓊爲
席池邊錦作鋪啼禽偏向竹戲鯉或依蒲風
雅開詩譜烟霞染畫圖淮山鴻寶地汾水白
雲都豈羨沉冥子潛身跳一壺

夏日承蘭社諸公招飲崇文書院賦酬

文園清夏氣秀樹滿涼陰美酒榴花席佳人
蘭葉襟鸞歌白日永鳳吹紫烟深試問傍觀
者寧知世外心

五日對榴花作

朱英嵌碧樹交加天與端陽潤物華如畫采
章明向日隔簾文綺散成霞芳連薜荔清無
限珍比珊瑚富不奢對酒頓令顏色好白頭
何許煉丹砂

五月既望蔭修竹之林漱清流之渚南

風時至宴言詠懷

炎景倏已邁大運迅回斡潛哲苦埃蒸高旻
思遣撥臨流携友生爰展素心澗竹氣酒庭
陰南薰飄木末綠條時可攀朱果適堪掇翔

鳥亦翩翩游魚何潑潑揮軫命飛觴瓊枝慰
饑渴輕舉雖未然拘方庶茲豁

送郭文山守備柴溝

本自濡翰希鳳舉今當射策事鷹揚登壇好
佩黃金印釋褐焉知紫繡裳大樹入雲閑幕
府高山壓海待銘章由來我武貞文畧叔甫
真堪奠朔方

伏暑高齋靜坐

逃暑西林一片陰高齋逕入白雲深長松箕
倨方紋簟短葛襪披小領衿御氣能令六月

息空心不受萬緣侵坐來自覺清凉滿何用
臺山頂上尋

題蔡使君獻壽北堂冊

維皇肇造陶世埴埏俾弘而家輔我 帝躔
無幽不暢有啓必先篤佑淑媛誕生偉賢
淑媛雍容柔嘉靜恭既勤既孝克順克從慈
惠周卹睦黨敬宗身其康彊元吉其逢
嗣賢翊翊維國之楨爲 天子使東南于征
持斧衣繡執規秉衡于藩于臬令儀令名
子以毋令 帝錫之慶榮榮服章光光寵命

遊社是膺克綏保定鼎養在陳鐘歌斯詠
歲八十春維毋元辰子爲憲翰堂有鴻賓祝
釐昭貺茹和飲醇神之聽之莫不景臻
在昔尼父綜文于魯正魯之詩特崇壽母君
有庭闈我有黻黼秩秩德音綿綿思枯

李澗南七十

休道人生須滿百得來七十已如仙兒孫置
酒南山對賓客陳詩北斗懸憶昔曾爲萊子
舞看今又見綵衣傳知君福德渺無極合與
靈椿較大年

畫苑看粉紅榴花

玩美若榴傍盈盈紅粉粧純丹疑太絢半素
見孤芳簾晃玻璃色杯搖瑪瑙光惟應多結
子玉樹共成行

詠白榴花

榴火千紅杳安知一白奇吳王憐皓齒楚女
嫉蛾眉篆玉瑤分禧調鉛粉結蕤最宜何處
玩清露捲簾時

詠東陵侯種瓜青門

不遠灞城邊栖遲避世賢平生列鼎食一旦

勸瓜田偶自藏名跡聊因寄歲年山河百戰
後故國幾家全

晨起涉園二首

山氣朝來爽炎氛帶雨消天青映池草水翠
瀝巖條竹密徑幽仄鳥稀人寂寥白雲如有
意孤景共誰招

拙訥自踈世遯栖奚所求有書惟種樹無壑
可藏舟龜用支牀足鳩將刻杖頭守吾先子
訓卒歲且優游

六月平霞館會

海城和
榆光荏苒數招邀霞館炎天慰寂寥雲度遠
山渾帶雨樹搖空水忽成颿登高尚欲翻詩
案茹淡無能棄酒瓢百事老來擔不得只應
閑境靜塵囂

懷王龍岡先生

三年不出意如何生日猶然謝客過聞道久
當同女偶卧病時復効維摩青山倦眺閑雙
屐白首怡顏眄一柯我亦逃虛虛未得羨君
真已遂巖阿

雨後看山

炎霧千峯隱涼颿一雨分始清開混沌太乙
共氤氲石黛烟虹彩蓮華水翠文具圖人不
識只解看浮雲

濮陽蘇礪石見訪兼遺令兄杏石訊用
韻贈酬二首

金昆居濟北玉友過汾西葉縣雙鳧引蘇耽
一鶴携白雲將雨至幽鳥向人啼契闊期闌
暑無嗟塞草萋

許國青雲世相逢喜復悽弓裘麟閣裏書劔
鴈門西蒿徑稀人跡柴扉有鳳題詎知瓊玉

樹使我得攀躋

初秋涼氣發

端居玩玄化
闌暑遽將稀
一帶曉林色
都含秋日暉
水華如鏡是
雲采似烟非
爽氣平分者
偏多在翠微

宗老小村翁七十

青春結社本無期
白首逢君七十時
却喜古稀今易得
因知仁與壽相隨
華觴滿酌瓊筵醴
茂苑爭攀桂樹枝
白鶴彩雲秋一片
玉笙清響賽瑤池

雨中玩木芙蓉

玩芳微雨裏
秋色乍燃紅
水彙名相似
木華原不同
群英羅戶牖
獨秀映簾櫳
可待成搖落
坐令心賞空

贈山僧三首

自笑無聞枉歲年
得公提起思悠然
瑯瑯大鼓初鉤後
寂寂洪鐘未扣前
忍草亂藤聊混俗
覺花啼鳥亦通玄
想應宿世曾參侍
今日重修傍老仙

康節能收宇宙春
莊生秋水湛精神
羨君身

世千年遠古老家風一樣新
虛室坐深惟潔白
玄言開朗盡清真
將因洗鉢從師去
可是龍華會裏人

白頭偃蹇世交疎
惟向青山守敝廬
何得遠公聞姓字
多因楊子好玄虛
攀緣直欲開蓮社
問難遙同講石渠
靜坐月明還憶否
竹林高館誦經餘

丙子秋送諸生赴試

秋灑新黃上綠槐
曉乘青靄餞高臺
周興選舉鄉閭薦漢辟
賢良冊府開千載
六經爲大

業幾人三對擢宏才
仰觀天路平如砥
直任扶搖萬里來

丙子生日自寬時年七十有二

好作歸人尚不歸
婆娑秋影對斜暉
有何陰騭天增筭
每到生辰客款扉
具席淡香鷄黍薄
摘園丹翠果蔬肥
自寬也學榮期老
羞觀黃金舊帶圍

廣庭流月華高閣凝餘霰中秋夜集西

園賦

中秋玩月興連天
拈出蘇州句一聯
高閣霏

凝殘雨後廣庭華滿薄霜前行同鄴園遊飛
蓋坐即梁園宴細旃藻思夜光相混合不知
身是大羅仙

和謝龍池翁見壽

喜見魚書寄八行未云葭水隔蒼茫青天夢
落東山墅白髮顏開北海堂俱寡世營成脫
略獨存吾道有張皇遙知著述盈金櫃何日
叅同草閣傍

鳳尾竹

鳴鳳化爲竹托根北園隙紛披九苞羽搖蕩

白雲秋冷吹清吟滿朝陽異采浮自然巢阿
閣安事此淹留

秋日郊園眺望

蕭然身世槿園西平楚蒼蒼望不迷黃葉露
零高樹老白雲風卷四簷低頽齡欲制還餐
菊逸侶相尋共杖藜餘興却隨秋浩蕩玉壺
新醪好頻携

九日登碧海青天樓

佳辰廣宇肅高寒作賦興懷信有端畫閣朱
樓千樹遶青天碧海一壺看花千臺彩金英

簇酒衍杯光玉露溥自古登臨誰不健只應
文賞性情寬

寄壽呂礪溪先生

梁園別後定何依知掩黃金臺畔扉節遇誕
祥遙記憶名高耆舊有光輝寒花擬酌千杯
獻朔鴈空傳一札歸所羨達生能不老烟霞
久已息塵機

九日賦白衣送酒於陶公

徑草已蕪沒黃花笑獨存蕭條佳節度淡泊
遠人村能使江州守來將栗里罇風流遙可

憶身約道彌敦

哭王龍岡先生

不謂黃鳥時俄乘白雲去論心少一人顧影
獨多慮惻愴山陽懷歛歔屋梁語總惟飄冷
香空是平生處

社日詠歸燕

社燕知霜信歸先旅鴈翔雲山望明滅烟海
憶微茫言鳥羞籠繫舞禽愁鏡粧何如自來
去華屋有高梁

采菊東籬下

陶令憐秋色東籬采落英豈無五斗俸自有
一簞情茹淡欲多遣守愚身寡營濁醪倘然
至聊爲歲寒傾

九日奉酬蓮社諸公見訪

下里欣逢上客來一尊同向九華開霜邊時
序驚秋往雲裏登臨傍夕迴木葉水波澄洞
壑巖嵐空翠寫庭臺大夫已老猶能賦却是
文人藻思催

秋思

半夜寒生青綺衾新霜蝕透紅樓瓦迢迢金
漏滴更長添得啼痕數行下

太霞亭上壽詞

壽星秋殷桐葉里寶鼎河山鬱金紫公子貞
符晉日文漢皇登貺汾陰時太霞真人當盛
時慶旦合天承景禧黃菊進齡朱果侑千秋
萬歲以爲期

贈趙小田生日

濯濯桂林枝亭亭英胄姿青山干木里綠圃
仲舒帷篇藻蘭瑤似丹青竹石宜老夫慙父
友之子視余師鄰曲每相顧平生遂見知寒

漁婦種
花標晚節祥旦應佳時我有一杯酒非君誰
爲持

起菜北郭圃九月社會分題

蓐食安隴畝野中方見容露凋林葉盡霜壓
圃蔬重薄采先葵藿兼收及菲葑亦知多苦
淡珍此御寒冬

丙子之秋再叨東府菊宴申寫頌言

去年觀菊宴一濫紫霞觴今歲看花賞重登
白玉堂天澄霜後碧樹颺雨餘黃應節偏佳
色開籬滿異香金童來捧出青女兢裁將錦
繡新爲段芙蓉舊作裳竹冠莪蔭采蘭珮藹
依光用表析齡頌千秋此郁芳

九月廿九日承蘭社諸公見訪二首

孤雲常獨往結駟詎來茲不謂離居日還成
對客時濕薪焚冷竈殘菊耀踈枝總爲談詩
好蕭條亦解頤

門外已車馬庭中方掃除自憐慵拙慣不覺
應酬踈家食慙多菲鄰醑幸未虛坐深畱更
住日短意恒餘

東籬苦菊

歲闌風始厲群彙見摧成卧聞寒葉響起視
菀飄揚園菊貞晚節順時胡不歲東籬結根
地况在南山傍埋采類幽晦旋復當輝光日
月儻余待長奉九華觴

木葉既脫爰整書齋

群木解已盡歲功方畢陳敞廬穿積雨荒徑
沒叢榛一展修平畧始諧清淨因下帷猶故
事神理日應新

送舉子會試一首

帝城煙柳萬家春文物咸熙雨露新紫琰玉
偶道合昌期進有因何獨廣川能大對羨君
今已冠天人

書堂冬日

夕吹一何凜朝曦還復暄定光從泰宇文曜
滿東軒剩有黃綿富寧要絳帳溫此時楊子
宅玄理正堪論

夜長

群動悄然息獨成今夜長匡牀坐迢遞還寢
夢微茫省已翻多慮懷人自不忘初昏期早

曙及曙尚蒼蒼

北野老人生日賦此招飲

夜長夢短坐待晨展轉忽憶山中人雲在石
門寒幾片定應裁作白綸巾山人今年七十
七手杖紫藤長八尺康老莊前有酒沽不來
訪我茆齋夕

壽雷水南先生

愛君皎然冰玉姿相對宛若攀瓊枝有客登
龍纜下榻無人放鶴獨支頤華辰十月明春
宴綺里南山定壽基借問昔時霄漢侶抵今

誰老鳳凰池

吊西齋奉國君

看破浮生更莫疑出頭便是盡頭時雲消大
海從龍去月滿長空任鶴之慣戰私憑三尺
劍能贏不過一盤棋漢朝何等麒麟閣落日
黃埃蔓草滋

詠蘇子十月之望步自雪堂

赤壁從前紀勝遊獨憐蘇子寓黃州霸圖慷
慨名空在逆旅登臨興未休斷岸雪堂乘月
啓寒波烟舫載雲浮劃然長嘯有誰答除却

玄裳會點頭

對酒短歌行在東臯社會作

眷言會止三歲載週日月其邁我處其休德
不孤立孰云寡傳久而敬之景仰前修世道
交喪惟僞是謀允矣君子視民匪媮賢而幽
放貴而散投樂其天年于此林丘嘉肴在御
旨酒思柔以飲以食式衍式畱疑義與析清
言用酬日牛無全意馬已收悠悠自信平浦
虛舟載其大化天迴地游以永今夕豈非所
求

呂祖像讚

玉京瑤島高玄萬劫真常老仙劍氣青蛇袖
裏笛聲黃鶴樓前

贈任司訓掌教深澤

西河舊範卜商儒文學今師有令模道在却
移汾席講經傳更與澤宮徒堂前冬日寒生
愛座上春風凍藻敷若向漢書觀禮樂五篇
應取頌皇都

疾夜四首

長夜如年病不支晨鐘欲動曙光遲呼童試

撥寒爐火倘有星星待煮糜
鳴葉階前片片飛焚蘭窓下冷烟紅何言此
夜獨無夢七十年來盡夢中
記得丁年坐夜深聞鷄每作扶風吟如今槁
木無靈氣只有寒灰是寸心
愁來一夜猶嫌永何事常懷千歲憂聞道司
空在王谷雙雙款語教人休

哭西齋君

瑤崑一峰倒琪樹一枝摧柱下青牛去遼東
白鶴回竹荒三徑種蓮罷二池栽壁字土花
繡齋書雲葉堆履綦難再得簪盍詎重來月
落猿偏斷霜深鴈獨哀有情悲自至臨感不
知裁

和小村看南洲說法兼贈南洲

錦囊詩草爛朝霞寒日扶筇野寺斜爲愛高
僧持貝葉因聽小品悟蓮花雲來却度講餘
磬烟起還燒飯後茶珍重長廊畱一語門人
應已學籠紗

高僧不愛著袈娑破衲猶云好自遮楫揆火
傍銷冷病瑠璃鉢裏飯胡麻跡深蘭若干峰

葉心轉蓮函一院花何事學人來問取殷勤
只與趙州茶

比夜長少寐思想平生謾成一律申社
長三翁

逐世無能但轉蓬飄飄迴向野田中放魚尚
怖鈎成月傷鳥猶疑箭落風舊業報顏渾作
夢老緣隨意且談空百年已過三之二幸把
餘生伴社翁

望介山緬懷郭有道先生

鴻飛白雲中衆鳥徒營營達士一何遠杳然
凌太清內蘊保身哲外無絕俗貞橫波順仙
棹角巾偶華纓誓將斷巨鰲支彼天柱傾時
哉不我與高嶺獨含情

雙樹軒茶會

雙樹結龍鱗同人向此臻手持青玉杖頭帶
白綸巾住近雲邊宅消閑霞外身圍爐啜香
茗聊用寫心神

白雪曲二首蘭玉堂稱壽

鄴醪如霞灑縹窳南山前捧萬年卮主人何
處動仙樂盡是高天白雪詞

一派高歌白雪寒四筵傾聽和皆難醉歸餘
響挂心曲回首蓬萊樹上看

寄題陽谿新理書齋

聞道新齋建宅西移將舊卷復深棲辭榮不
餌千鍾祿茹淡寧其一甕齏陋巷客稀門總
閉閑塔兒戲手頻携尋常莫作茅簷看天際
白雲聊與齊

壽蘭軒君

龍華高會慶生時獸炭烘堂酒煖卮白雪唱
中人寡和南山詩裏壽多期蒼蒼松桂森顏

色歷歷星辰粲羽儀說道是仙君不信冰桃
爲底摘瑤池

壽東臯翁

大塊逸君老焉知老更強紅顏賽桃灼白髮
比松長燈下看箋字枕中藏秘方喜筵仍戒
酒靜室但焚香身際四朝盛家觀五葉光南
星當戶牖北斗挂門堂洪福由天授浮生安
可量

壽乾石

亭亭連枝樹矯矯薄暮年勁幹保霜雪榮條

春復然雖無薜華姿頗類古老仙塵物日以
遠天親樂無邊舉俗愛生辰况乃同生緣同
生何所願惟願永貞堅大椿爲我友喬松我
師焉寄興在鄴醪取笑南山前

兒階生日詩以勉之

年當五五學何如可是趨庭効伯魚門子未
能恢舊業里人空想建高閣青天王宇三條
路綠閣芸窓萬卷書今日發心良自勉後期
猶恐更成虛

臘月八日醮佛讚

維臘之吉供養和南于我世尊報厥恩覃法
門不二風幡豈三非空非色即心是叅

社會分韻得歲寒松栢

我觀貞樹林松栢得其深葉葉冰霜保枝枝
蘿烏尋神方收絳液仙騎舞玄陰不省丘中
事焉知歲暮心

玉樹篇贈山泉宗尉四句

桂苑亭亭玉樹枝蓬宮表表列仙儀延齡定
管三千歲聞道欣當四十時栢葉翠樽酬令
節梅花綵杖報春期爲歡正及朱顏好試聽

南山小雅詩

小堂觀妓

寒堂春欲到座客笑顏多翠黛驕銀燭紅香
撲綺羅吳歛翻子夜楚舞學陽阿却恐迎風
去頻看襪上波

青蓮精舍守歲

殘年此道盡暮緒益蒼茫下上樊籠鳥東西
岐路羊都令憂速老轉使聖成狂諸法原空
相回頭禮定光

丙子稿終